

E trikolornan ku interes den Quinton Christina

WILLEMSTAD---Despues ku ya a bira konosí ku ta trahando pa asina por kontu ku e futbolistan Christopher 'Papa' Ilenia i Jonathan 'Jòn' Libania, komo refuersonan, awor e trikolornan ta interesá den Quinton 'Messi' Christina tambe.

'Papa' i 'Jòn', ta futbolistanan di e ekipo di Atlético

Flamingo, aktivo den futbòl FFB na Boneiru. Mientras ku Christina a regresá Kòrsou e aña aki, despues di tabata establese na Hulanda. Despues di rumornan ku lo e por djòin sea e ekipo di Jong Holland òf Inter/Willemstad, Quinton a skohe finalmente pa e ekipo di barío di Kintjan i bisindario. Pero mirando ku e no tabata aktivo ain-

da den futbòl lokal, pero si ta den gran forma, tékniko di e trikolornan a musta interes pa por kontu ku e talentoso mediokampista aki. Un ke otro komo refuerso pa CFU Club Shield 2024, unda Jong Holland lo ta den akshon di 25 yùli te ku 5 ougùstùs benidero, den representashon di Kòrsou, den torneo ku lo hunga riba nos isla. •



Quinton 'Messi' Christina.

Young Boys ta bira kampion den Curfutsal

WILLEMSTAD---E ekipo di Young Boys, ku ta kontu ku futbolistanan konosí manera entre otro Quinten Christina, Sugently Martha, Benjamin Gil

Guedes i Adonis Verginie, a logra pa konkista e titulo máksimo den e divishon máksimo di Curfutsal su kampionato 2024.

Esaki tabata despues di un triunfo pa goliada ku skor di 6-1 riba e ekipo di FCCE United, djasabra último. FCCE United ta kontu ku entre otro futbolistanan Naigel Valorian, Jeandrick Hugo, Djurson Pieters i Rayshenel Justiana. E wega final a mira akshon djasabra último, komo e di 2 final riba kancha di sala deportivo Errol Rooi den Sentro Deportivo Kòrsou, na Brievengat. E goliadonan pa e ekipo kampion tabata Adonis Verginie (2x), Quintin Christina, Alejandro Fernandez, Benjamin Gil



Akshon den e final.

Guedes i Michael Hall. Pa e supkampionnan tabata Rayshenel Justiana, kende a anotá e úniko gol.

Final di 2 divishon

Den e promé wega final di anochi, bálido pa e di 2 divishon, tabata Ocean View Royalty, ku entre otro Stallone Ilenia, Michael Pinedo i Michael Deonicio, ku ta gana di SV GBC Gibralt-

ar, ku ta kontu ku entre otro Nixon Buntin, Fediengelo Hooi i Melvin Alexander, pa logra e titulo. E wega final den di 2 divishon a tèminá ku skor di 3-1. Michael Pinedo (2x) i Aaron Mambre a anotá pe e ekipo kampion, mientras ku Melvin Alexander a salba honor pa e supkampionnan. Despues di e weganen final, tabatin entrega di premio. •



Young Boys kampion.

Proyekto pa hóbennan U-16 den barío...

"Partisipá ta mas importante ku gana"

WILLEMSTAD---Djasabra anochi Remko Bicentini i miembronan di su fundashon a dal e promé paso, pa ku nan proyekto, ku próksimamente lo mira akshon riba nos isla. Ta trata aki di un proyekto sosial/deportivo bou di nòmber "Van STRAAT naar STADION", den kual entre otro hóbennan di 14 barío lo kompetí kontra otro den e deporte di futbòl, ku weganen den barío.

Djasabra último a reuni

ku lidernan di e diferente barionan ku a inskribí, unda Remko a duna hopi informashon pa loke ta wòrdù sperá, e meta i inkluso informashon di e deporte rei mes, pa asina e lider/coachnan por pasa esaki pa nan respektivo miembronan di barío, unda por tin partisipantenan tantu maskulino komo femenino. Remko a splika ku naturalmente tur ekipo/barío lo kier gana, pero ku ta bai mas pa e motivashon den barío, union, edukashon, traha huntu i pa

por ta un mihó hende den futuro i un ehèmpel balor pa komunidad, ku atenshon riba e parti sosial i deportivo, pa hóbennan te ku 16 aña, ku embolbimentu di mayornan. Tur partisipante lo risibí na final di e proyekto un medaya i un sertifikado, mientras ku e timnan ganadó lo risibí un trofeo. Tambe lo premia esnan ku gana den e kompetensia di tiramentu di pinalti i otro kompetensianan. E anochi di djasabra tabata unu eksitoso, tantu pa loke ta presensia i partisipashon,



Miembronan di e fundashon, den kompania di representantenan di e barionan partisipante.

unda ku konhuntamente a deliberá, riba e totalidat. Tantu dr. Ramfis Fillet, kende ta duna un man pa ku e parti médiko, a duna algun splikashon, mientras ku Valentino 'Tino' Chance, kende ta otro miembro di e fundashon i konosido persona den arbitrahe di futbòl, a pasa riba entre otro e reglanan di e torneo, ku lo hunga den barionan unda tin kanchanan

ku diferente grandura, pero e focus ta pa e hóbennan ta hungando bala. Na final Bicentini a duna un splikashon amplio di metanan i kon lo yega na e ganadó, kual banda di weganen ganá tambe por optené i pèrdè punto, pa entre otro komportashon i komunikashon. E ekipo ganadó, lo kontu ademas ku un gran fiesta komo premio, pa habitantenan di e barío. •